

**REGIONAL NEWS BULLETIN**

**HEADLINES (MORNING)**

1. Mizoram District 9-a Village Council leh Aizawl Municipal Corporation leh Lunglei Municipal Council huamchhunga Local Council inthlan a chuh tumte tan hming pek luh hun chu vawiin hian a tawp ang.
2. Mizoram Truck Owners Association (MTOA) leh Mizoram Truck Drivers Association (MTDA) chuan Vairengte leh Sairang inkar National Highway kawng chhia avangin vawiin atang hian an ding dawn.
3. Sawrkar laipui chuan Jute sawngbawl loh hralhna Minimum Support Price chu kum 2025-26 chhungin tihpun a remti.
4. Maharastra-a rel chesualah mi 11 aia tlem lo an thi a, mi 14 in hliam an tuar.

<><><>

**VC/LC**

Mizoram District 9-a Village Council leh Aizawl Municipal Corporation leh Lunglei Municipal Council huamchhunga Local Council inthlan a chuh tumte tan hming pek luh hun chu vawiin chawhnu dar 3 ah khar a ni tawh dawn a,

Hming pekluh te hi naktuk chawhma dar 11 atanga endik tan a ni anga, inhnukdawk duh te tan karleh thawhtanni chawhnu dar 3 thleng hun hawn a ni ang.

Aizawl, Lunglei, Champhai, Serchhip, Mamit, Kolasib, Saitual, Khawzawl leh Hnahthial District bakah Aizawl Municipal Corporation leh Lunglei Municipal Council huamchhunga Local Council-ah te thla thar ni 12 ah inthlan neih a ni anga, vote hi chhiar nghal a ni ang.

Local Council leh Village Council inthlanna atan hian political party te nasa takin an inbuatsaih mek a, district thenkhatah chuan candidate te an puang a ni.

Thenzawl Vantawng Group YMA Hall ah ZPM Thenzawl Block huam chhunga VC Candidate tur puanna hun ah thusawiin bialtu, Chief Minister Pu Lalduhoma chuan Kalphung thar Mipui Sorkarin rorelnaa Pathian ram a thlen theih nan leh Sorkar hmalaknain mipui tana hmasawna tluantling a thlen theih nan Sorkar lai thawhpui thei tur LC/ VC a mamawh a ti a.

LC/VC te chu Sorkar kut leh ke pawimawh tak an ni a, LC/VC tha nei veng leh khua chuan hmasawna tam tak an khawtlang tan an chawlut thin a, chutih laiin Opposition LC/VC te zingah sorkar thawhpui hleitheilo an awm chuan, Sorkar hmalaknain mipui a thleng zo lo fo thin a ni a ti. ZPM Party chuan hmasawna hna a thawh tak tak dawnin Sorkar lai thawhpui thei LC/VC an pawimawh zia a takin an tawng chho mek a ti.

Mizo National Front (MNF) Serchhip Block ‘E’ ten Serchhip khawpui chung VC Area hrang hranga MNF Party aiawh a VC Candidate tur te nimin khan puangin, he hun hmanpuitu MNF Gen Hq Secy Pu J. Malsawmzuala Vanchhawng chuan, VC leh LC te term dinglai ZPM sorkarin thla 6 chuang zeta pawt tawi a, Dan kalh a a hun hmaa inthlanna a buatsaih lui tur chu mipui rorelna (Democracy) kalphung zah lohna leh pawngsualna nasa tak a ni a ti a,

Ngaihnan inang lote inpawm tawn thiamna chu Democracy chakna leh ropuina anih laia ZPM sorkarin 'Party Bil Sorkar' din a tumna langsar tak chu an vote hmanga dodal turin mipuite a sawm a, Kumin VC Election-ah hian Education Dept. hnuai zirtirtute chu a buai ber tur annih dawn thu leh inthlan hun tur hi pawl 10 exam dawn tep lai a ni a, zirlaite tana boruak dang siam hun loh lai taka VC inthlanna buatsaih luih a ni tur chu ZPM sorkarin zirlaite leh zirtirtute a ngaihthah zia ti Chiangtu a ni a ti a, Ration Buhfai khulna man ZPM sorkarin a leta a ti sang thut mai chu mipuite dinhmun zirchiang hmasa si lova sorkarin a thuneihna a hman khumna lungchhiatthlak tak a nih thute, buhfai Grade A supply tur anga sawi a nih laia tun thlenga buhfai ngai reng sem chhunzawm reng ala nih thute, a tira sawi rik miah lo 'Card Sen' siam belh hnuhnawh leh a ni chu ZPM sorkarin zirchianna mumal nei a neih hmasak loh vang anih thu a sawi bawk.

<><><>

**TRUCK OWNER**

Mizoram Truck Owners Association (MTOA) leh Mizoram Truck Drivers Association (MTDA) chuan Vairengte leh Sairang inkar National Highway kawng chhia avangin tukin atang khan an ding tan.

Mizoram Truck Owners Association Secy Pu Dina Tlau hnen atanga thudawn danin, zing dar 7 ah MTOA Site Office Rangvamualah an tan a, hemi hunah hian Kolasib leh Kawnpui ah an tan ve nghal a ni.

Pawl 2 te hnuaiah hian truck 600 vel an in register anga chhinchhiah a ni a, Mizoram Supply Dept leh FCI buhfai phurh chui an hnapui ber a ni a, anni bakah hian Mizoram Tipper Association leh Kolasib District Tipper Assn te, Kolasib Dist chhunga truck driver leh Owner Jt Action Committee, leh Kawnpui Town Truck Driver Assn ten pawl 2 te hmalakna hi thlawpin tlan loh an tum ve bawk a, anmahni hmun theuhah an duty dawn niin a sawi.

Pu Dina Tlau chuan kan corr zawhna chhangin, tun tuma truck a din avang hian Insakna bungrua, Balu, Itta leh cement te phurh a ni dawn lova, Cachar Lam Truck neitu pawl te an din dawn bawk avangin Mizoram chakkhai nitin mamawh phurh luh a ni dawn lo bawk a ni. Kawng hi zawh tlaka an siam hma chuan an tlan lovang tih sawiin nikum kum tawp atang khan kawngchhia avang hian an buai tawh a, sorkar nen an inbiak hnuaiah ruah han hnuaiah siam tur an ti a, an ngaichan fe hnuaiah a thal vaekchar a ni tawh a kutthlak a awm loh bawk avangin an tan tlan ngam a ni tawh lo a ti bawk.

Hetihlai hian, All Mizoram Petroleum Dealers Association (AMPEDA) hruaitute chuan truck intelkhawm tlan tumlo mahse an tlan dawn an ti a,

Supply Department atanga thudawn danin, Mizoramah January thla daih buhfai khawl sa an nei a, furpui huna dah that atan stock kalpui leh mek anih avangin a phurtu truck an din rei chuan an tuar phah thei a ni.

<><><>

## **KOLASIB**

National Highway kawngpui siam mek chungchangah chak zawka hmalak a nih theih nan hmalak dan tur thlirin ninin khan Kolasib DC Pu Robert C. Lalhmangaiha hovin a pisa ah meeting a ni a.

He thutkhawmna ah hian National Highway 306 Kolasib to Kawnpui inkar kawng siam meka hmalakna kal mek sawiin Kolasib DC chuan he lai kawng siamtu NHIDCL hnuaiah Balaji Construction-te chu ruahmanna awm tawh ang ngeiin Kolasib to Kawnpui kawngpui siam Black Topping hi kumin March ni 31 a zo fel hman turin a chah a. Fur khaw chhiat hma ngeia kawngpui siam hna hi zawhfel a nih loh chuan mipuite bakah a kawng siamtu Company-te tan pawn harsatna lian zawk a awm thei dawn tih a hrilh a. DC chuan National Highway 306 chu Mizoram luhka pawimawh tak a nih angin Kolasib mipui mai ni lo Mizoram pum mipuite tan nitin mamawh chawkluhna kawng pawimawh tak a ni a, chumi chu hrereng chungah kawng siam hna hi chak zawka thawh a pawimawh thu sawiin, Balaji Company-te chu thawktu leh hmanrua pawh lakbelh turin a chah nghal bawk.

He thutkhawmna ah hian Kolasib to Kawnpui Highway kawngpui siam mekah inzawmkhawm pawl thenkhatte'n lungawi lohna an thlen te chu ngaihtuah ho a ni bawk a. DC Kolasib chuan he kawngpui siam mekah hian mipuite chu a siamtute tan harsatna siamsak lo turin chah a, kawngpui tha tak siam a nih theih nan Sawrkar leh a siamtute chuan an theihtawp an chhuah a ni tih hria a, zaidawh taka awm turin a chaha. Pawl anga lungawi lohna lan tirna a awm pawn mipui leh khawtlang nunphung tibuai lo zawnga tih lan ni thei se tiin a ngen a. National Highway dangchat zawnga hmalakna emaw mipui nunphung tibuai zawnga hmalakna awm lo se a duh thu a sawi bawk a ni.

He hunah hian Kolasib Superintendent of Police Pu David H Lalthangliana pawhin thusawiin kawng siam hna chak leh tha taka kalpui a nih theih nan lirthei kal dan vilpui turin leh a tul anga tanpui turin Kolasib SP Office chu an in peih reng thu a sawi bawk.

He thutkhawmna ah hian Kolasib DLh SP bakah Kolasib Addl. DC, NHIDCL leh Balaji Construction-a thawktute, Mizoram PWD lama thawktute, Sub-Hqrs YMA leh Joint Action Committee Mizoram Truck Owners Association aiawhte an tel thei a ni.

<><><>

## **REFUGEES**

Ninin khan tlawmngai pawl Cod Nerc, Mizoram leh Impulse NGO Network, Shillong te chuan Minister of State Pu B. Lalchhanzova pisa – ah himna zawnga Mizorama rawn raltlante chhawmdawlna kawnga an hnathawhte thlirletna hun an hman.

State Team Lead Impulse NGO Netowrk leh Cod Nerc Chairman Pu C. Lalmuanthanga chuan Raltlan chhungkua mi 500 hnenah thla 6 chhungin ration pek niin kum 2023 July thla khan Champhai Disatrick tan damdawiin khum 100 leh damdawiin mamawh hrang hrang CMO, Champhai ah te pek an nih

bakah raltlan leh khawtual mi chhungkaw 241 ten hnenah serthlum leh Apple chinna pek niin ram acre 317.5 ah thlai te chin a ni.

Pu B.Lalchhazova chuan Mizoramah Sawrkar leh NGO te thawh hona tha zawk neih a tul thu sawiin NGO te hmalakna chuan sorkar tha nasa taka a tih chak thu a sawi a. NGO lam pawh Sawrkar puih duhna rilru pu chung department te nen thawh ho theihna kawng dap thiam zel turin a chah a ni.

He hunah hian, Horticulture Addl Director Pu L.Lalhmingmawia chuan thu sawiin thingtlang khaw hrang hranga Impulse NGO Network leh Mizorama an state Partner Cod Nerc te sawrkar department nen tangkawpa an hmalakna avangin thingtlang loneituten thlai thar tam tak an thar chhuah bakah an hralh thei chu lawmawm a tih thu a sawi.

<><><>

#### AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihtlak leh chhiar theih a dah a ni.

Vawiin chawhnu dar 2 leh a chanve-ah Chanchinthar hi puan leh a ni ang.

<><><>

#### RAW JUTE

Sawrkar laipui chuan Jute sawngbawl loh hralhna Minimum Support Price chu kum 2025-26 chhungin tihpun a remti. New Delhi-a chanchinbumite kawmin Union Commerce and Industry Minister Piyush Goyal chuan Union Cabinet chuan MSP hi tihsan a rel a ti a. Raw jute quintal khatah Rs.5650 MSP siam a ni a ti a. Hei hi nikum aiin cheng 515 in a sang a ti a. He thutlukna avang hian loneitu chhungkaw nuai 40 chuangin a hlawkna an tel dawn a ni a ti bawk. (byte)

Hei bakah hian Union Cabinet chuan National Health Mission chungchang an thlirho a ti a. Ahmaa an lo rel tawh angin kum hnih dang atan National Health Mission hi la kalpui chhuzawm an remti a ti a. Kum 2021 khan Union Cabinet chuan National Health Mission hi kum 2026 thlenga kalpui a lo rel tawh a ni.

(Newsonair)

<><><>

#### BBBP

Prime Minsiter Narendra Modia chuan Beti Bachao Beti Padhao chu nunphung siam danglam a,mipuie theihna hmanga hmalakna ropui tak a nih thu a sawi. Beti Bachao Beti Padhao kum 10 tlinna puala social media-a a thudahah he thu hi tarlangin Pu Modia chuan he beihpui thlaknaah hian kil tin atangin mipui an tel a ti a. Mipa leh hmeichhe inkar inthlahna zau tak awm thin titem turin Beti Bachao Beti Padhao hi hmanrua tan hman a ni a ti a. Hmeichhe naupangten zirna tha an dawn a, an beisei tihhlawhtlin anih theih nan tangkai taka hman a ni a ti bawk.

Prime Minister chuan naupanga mipa leh hmeichhia tam lam inthlah nasatna district-ah te hmasawna a awm mek a ti a. Mipuie leh pawl hrang hrang thawhrimna avangin heng mellung pawimawh tak tak hi phun a ni a ti a. Pu Modia chaun mitinin mahni fanu te chanvo hum sak a, zirna tha leh thliarhranna awm lo vantlang nun siam theuh turin a chah a ni.

(Newsonair)

<><><>

#### MAHARASTRA TRAIN ACCIDENT

Maharashtra-a rel chesualah mi 11 aia tlem lo an thi a, mi 14 in hliam an tuar. Rel chetsualna hi Jalgoan district-a thleng niin khualzin phur Pushpak Express chu Karnataka Express relin a su a. Jalgaon SP Dr. Maheswar Reddy chuan hliam tuar zingah ngaihtuahawm an awm lo tih a sawi a ni. Maharashtra Chief Minister Devendra Fadnavis chuan rel chetsualna thlenga thi an awm chu pawl atih thu sawiin an chhungte hnenah cheng nuai 5 theuh zangna dawmna pek a ni ang a ti a. Hliam tuarte pawh an inenkawlna senso sawrkarin a tum vek dawn tih a puang bawk a ni.

President Draupadi Murmu leh Union Home Minister Amit Shah te chuan vanduinna thleng chu pawl an tih thu an sawi a. President Murmuii chuan hliam tuarte an dam thuai theih nan duhsakna hlan a. Union Home Minister Amit Shah pawhin vanduinna thleng chungchangah Maharashtra Chief Minister Devendra Fadnavis a bia a, tualchung thuneituten hliam tuarte enkawl kawngah theihtawp an chhuah dawn tih a lo hrih a ni.

(Newsonair)

<><><>